

**EKALESIA FAAPOTOPOTOGA
KERISIANO SAMOA**



**TUSI 'AU LEOLEO
2024**



Ia Tatou Tatalo

Upu Tomua

E totogo pea moemoe o le agaga faafetai i le Atua le Leoleo sili, ona o lana ta'ita'iga alofa i le folauga a le Ekalesia mai lena tausaga, ao alofaiva ai le ma'ave eseese o le nofo a Matagaluega, Pulega ma aulotu taitasi o le Ekalesia, e le gata i tapenaga i manuia i la le tino, a ua sili i le soifua faale agaga. E silisili fo'i le agaga faafetai i le lagona mautinoa, e le'i tuāfoe le faasoaina o lou faiva tatalo na faanōnō i le lagi, ua manuia ai ala uma o la tatou faigamalaga. Faamalo, faafetai i le Ekalesia le mataala i le tatalo.

O lea ua maea la tatou Tusi Tatalo mo le 2024, e pei ona saunia ma tapenaina e la tatou Komiti Au Leoleo, mo sauniga o lenei tausaga. E faamauina foi le faafetai a le Peresetene ma le Komiti, i le ma'au faale agaga o uso faifeau na tapenaina lenei fa'amoemoe. O le Susuga ia Simona Ene (FS), o le Matagaluega Kuiniselani Saute na saunia Ianuari-Iuni, ao le Susuga ia Ioane Aloalii (FS), o le Matagaluega Kuiniselani na saunia Iulai-Tesema. Avea ia lenei tapenaga o ni nai seuseu, auā le magālafu nai le faletele, ia mumu saesae ai le afi o le soifua tatalo o le Ekalesia, ia fofoga le Atua ma tali faaaliali auā manuia mo a taeao.

Tatou fa'aauau pea ona tatalo

Faafetai

Uilipifosi K. Te'o FS

Failautusi Komiti Au Leoleo

Ianuari 7 - 13

Tusi Faitau:

Manatu Autu:

Iosua 1:1-9

Afua se taeao fou

(A new beginning)

Faafetai

Tatou faafetaia le alofa o le Atua ina ua tatou aulia mai lenei tausaga fou. E ui ina lutia la tatou faigamalaga i le tele o fita ma faigata, peita'i e le i tuulafoai'a e le Atua tatou o lana fanau faatuatua.

Faatoesega

Ia faamagalalo mai e le Atua lo tatou ola femoumoua'i i lena tausaga ua mavae. Faamagalalo le tele o a tatou folafolaga na fai, a ua le mafai ona faatino. Ona o le ola faapalapala ma le paie ma le toilalo pea i le ola agasala.

Manaoga

Ia faatonu folau pea e le Atua la tatou faigamalaga ua amatalia. Ia tumau mai le Agaga Paia e taitoalua ona tagata, e sao ai ma uli lo tatou sa, ae foi ai pea le viiga ia te Ia.,

Ianuari 14 - 20

Tusi Faitau:

Manatu Autu:

Eperu 12:1-3

Taula'i pea le silasila ia Iesu

(Stay focused on Jesus)

Faafetai

Tatou faafetai i le Atua ona o lona faamaoni i ona tagata. Ua ia foaiina mai lona Alo pele e toatasi, e fai ma faaolataga mo i tatou tagata agasala.

Faatoesega

Ona ua tatou o ese mai le faia o le finagalo o le Atua, ona o tuinanauga o le ola. Ona ua tatou toilalo le agasala.

Manaoga

Ia fesoasoani mai le Atua, e faasagatonuina o tatou ala. Ia faamalosi mai le Agaga ina ia taula'i ai pea la tatou vaai ia Iesu Keriso lo tatou Alii Faaola.

Ianuai 21 - 27

Tusi Faitau:

Ieremia 29:10-14

Manatu Autu:

O le fa'amoemoe o le Atua mo le tagata

(God's purpose for you)

Faafetai

Ona o le Atua ma lona faaaogaina o le tagata. Ona o le fa'amoemoe o le Atua mo tagata uma, ia iu i le manuia. Ona o le Tusi Paia, o loo faailoa mai ai Lona finagalo.

Faatoesega

Ona ua tatou le iloa le fa'amoemoe o le Atua mo i tatou. Ona ua faamuamua le iloa faa le tagata, ua galo ai Lona finagalo i mea e manuia ai.

Manaoga

Tatou fa'amoemoe i le Atua e manuia ai o tatou aiga, nuu ma ekalesia. Ia aualiitia e le Agaga Paia la tatou savaliga.

Ianuari 28 – Fepuari 3 **ASO SA O TUPULAGA**

Tusi Faitau:

1 Korinito 13:1-8, & 13

Manatu Autu:

O a foliga o le alofa?

(What does love look like?)

Faafetai

Ona ua faailoa mai e Iesu, auala eseese e faatino ai le alofa. Ona ua tatou maua le alofa faale Atua, tatou te lavatia ai mea uma.

Faatoesega

Ona ua tatou le faatinoina le alofa, ona o le faamaualuga ma le manatu faapito. Ua tatou le manatua le alofa faamagalalo o le Atua.

Manaoga

Ia fesoasoani mai le Atua, e faaatoatoa lo tatou alofa mo isi tagata. Tatalo ia faapa'ia lo tatou ola ofoina mo ia ma ana feau. Faamanuia le sauni o fanau mo a'oa'oga o lenei tausaga.

Fepuari 4 - 10

Tusi Faitau:

Teuteronome 26:16-19

Manatu Autu:

O manuia o le ola usita'i

(Blessings through obedience)

Faafetai

Ona o manuia o le Atua ua faailoa mai, mo e tausi i ana poloaiga. Ona o le mafanafana o mafutaga e maua mai le ola usita'i.

Faatoesega

Ona o lo tatou le usita'i i le Atua, a e fai o tatou loto. Ua tatou mele faamanuiaga i lona alofa tunoa, ina ua galo le tulafono o le alofa.

Manaoga

Ia fesoasoani mai le Agaga, i la tatou savaliga. Tatou tatalo i le Atua, e foai mai le loto salamo e toe afua ai le usita'i.

Fepuari 11 – 17

Tusi Faitau:

Kolose 3:12-17

Manatu Autu:

O le alofa, o le faamagalalo!

(To love is to forgive)

Faafetai

Ona o le alofa faamagalalo o le Atua i o tatou tagata agasala. Ona matagofie o le ola faamagalalo.

Faatoesega

Ona ua tatou le maua le loto faamagalalo. Ona ua leai se alofa i o tatou loto.

Manaoga

Ia tatou maua pea Lona filemu, e faagalo ai sese ma faaletonu o isi uso-a-tagata. Tatalo ia i ai tatou lona filemu e solia ai le matau'a ma le tau ma sui.

Fepuari 18 - 24

Tusi Faitau: **Mareko 11:20-25**

Manatu Autu: **Ia faatuatua**
(Have faith)

Faafetai

Faafetai i le Atua i lona talia o tatalo ua faia i le faatuatua. Faafetai ona o le faatuatua o tua'a ua mavae.

Faatoesega

Ona o le femoumoua'i o lo tatou ola faatuatua. Faamagalo i tatou ona ua faalautagitagi lo tatou faatuatua pei o le mati ua le fua.

Manaoga

Ia maua pea le faatuatua i le Atua, i soo se ituaso o lo tatou ola. Tatou tatalo mo e ua ave i ai le faatuatua i le ta'ita'iga o le malo o Samoa, aemaise aiga nuu ma Ekalesia.

Fepuari 25 - Mati 2

Tusi Faitau: **2 Tesalonia 1:5-12**

Manatu Autu: **O le Lagi po'o Seoli?**
(Heaven or Hell)

Faafetai

Ona o le finagalo alofa o le Atua, ua le faia ai seoli mo tatou tofi. Ona o le avanoa mo le ola salamo e sa i ai i le ola faavavau.

Faatoesega

Ona o a tatou amio le taupulea ma le mataga. Ona o lo tatou le usiusita'i atoatoa i le talalelei ia Iesu Keriso.

Manaoga

Ia ina atagia le malo o le Atua i o tatou olaga. Ia avea le galuega o le Talalelei, e laveai mai ai fanau a le Atua, ua tauau ina pau'u atu i le malaia.

Mati 3 – 9

Tusi Faitau: **Esoto 14:13-18**

Manatu Autu: **E ta'ita'i malaga le Atua**
(God leads)

Faafetai

Tatou faafetaia le alofa ta'ita'i o le Atua, ua saogalemu ai la tatou malaga. Ona o Iesu, ua tatou maua ai le ola e faavavau. Tatou faafetai i le faatasi mai o le Agaga Paia, ua manuia ai faiva.

Faatoesega

Ona o lo tatou o ese soo mai le ta'ita'iga a le Atua. Ua tele ina galo ia i tatou, o le maluu ma le toetu o Keriso, o lo tatou ala i malo.

Manaoga

Tatou tatalo mo le atamai mai le Atua, tatou te iloa ai ona ala. Ia fesoasoani mai le Agaga e faasino pea ia i tatou, ala e tautua ai lana galuega.

Mati 10 – 16

Tusi Faitau: **Isaia 53:1-6**

Manatu Autu: **O ona manu'a, ua malolo ai tatou**
(By His wounds, we are healed)

Faafetai

Ona o le maluu ma le toetu o Iesu Keriso, ua faamagaloina ai a tatou agasala. Aua ua a'oa'o mai puapuaga o le Alii, ua tatou lavatia ai faigata o lo tatou olaga i aso uma.

Faatoesega

Ona ua tele ina galo ia i tatou puapuaga o le Alii. Ona ua tatou 'alo ese mai tiga o le ola tautua, ina ua tatou fiafia i mea faigofie o le olaga.

Manaoga

Ia fesoasoani mai le Alii i le puapuaga o le fanau a tagata, ona o faama'i, o taua ma fevaevae'iga. Tatalo mo e sauaina ona o le talalelei. Faamanuia i e o mama'i i aiga ma soo se maota gasegase.

Mati 17 – 23

Tusi Faitau: **Ioane 8:31-47**

Manatu Autu: **Tatou o sulii o le Malo**
(We are heirs of the Kingdom)

Faafetai

I le Atua ona ua vaetamaina i tatou i lona alofa tunoa. Ona o ana Afioga ua faailoa mai ai le ala i le manuia.

Faatoesega

Ua tatou le iloa o i tatou o tagatanuu o le malo o le Atua. Ona ua le moni lo tatou avea ma sulii, ona o le manatu faapito, ma le faamaualuga.

Manaoga

Ia fesoasoani mai le Atua, ia tatou mautinoa lo tatou valaauina e avea ma sulii. Ia fesoasoani mai le Agaga ina ia tatou faamaoni i o tatou valaauina.

Mati 24 – 30

Vaiaso Paia - ASO SA O LE LAUPAMA

Tusi Faitau:

Mataio 21:1-11

Manatu Autu:

O ai ea lenei tagata?

(Who is this?)

Faafetai

Ona o le afio mai o Iesu Keriso o lo tatou tupu. Ona o le faaolataga na saunia e Iesu ma e togiola ai le tagata agasala.

Faatoesega

Ona o le tatou ta'uta'u pea le suafa o Iesu, ae o loo tatou faia pea amio mataga. Ua tatou le mulimuli i ala o le Tupu o tupu.

Manaoga

Ina ia aveese lo tatou ola femoumoua'i ma le faafoliga. Ia tatou malaga pea i le filemu ma le loto maulalo e manuia ai.

Mati 31 – Aperila 6

ASO SA O LE ESETA

Tusi Faitau:

Ioane 14:1-14

Manatu Autu:

E na o le tasi lava le ala

(There is only one way)

Faafetai

Tatou faafetai ia Iesu Keriso, o Ia lava le ala, upu moni ma le ola. Ina ua tatou mautinoa ua saunia mo e faatuatua le ola e faavavau.

Faatoesega

Ona tatou le savavali i le ala ua faailoa mai e Keriso. Ona o lo tatou pala'a'ai e tautala i le upu moni, ona ua fefe i le lalolagi.

Manaoga

Ia galue mai pea le Agaga Pa'ia, e ola ai o tatou agaga. Foa'i mai le malosi i lana Ekalesia, aua lana galuega molimau..

Aperila 7 – 13

Tusi Faitau:

Failauga 5 : 8 – 10

Manatu Autu:

O lelei ma leaga o le tupe

(The pros and cons of money)

Faafetai

Ona o lona tamaoaiga, ua mafai ai ona tausia aiga aemaise o le tautuaina o le Ekalesia. Ona auala eseese ua faasino mai e le Agaga e atiina'e ai manuia auā tagata lautele.

Faatoesega

Ona ua tatou le faaaogaina tatau tupe mo atiina'e e manuia ai, a ua tatou faaoga i mea le aoga o le lalolagi nei. Ona o lo tatou lima mau e foa'i mo le Atua.

Manaoga

Ia fesoasoani mai le Atua ina ia tatou iloa ona faasoa lelei le tamaoaiga ua ia aumai. Fesoasoani mai le Alii, ia tatou iloa pea, e le sili le tupe nai lo le amiotonu.

Aperila 14 – 20

Tusi Faitau:

Efeso 2 : 1 – 8

Manatu Autu:

O le meaalofa o le Alofa Tunoa

(The gift of Grace)

Faafetai

Ona o le meaalofa o le alofa tunoa, ua faaolaina ai tatou. Ona o le atulasi o meaalofa ua faasafua mai e le Atua mo le ola lelei o le tagata. Ona o Iesu Kersio, o le meaalofa sili mo le tagata agasala.

Faatoesega

Ona o lo tatou le mautinoa o Lona alofa tunoa, ua mafua ai ona tatou mulimuli i tu ma aga o le lalolagi. Ona o le faapito o lo tatou alofa, ua le faasafua atu i e o manaomia le fesoasoani.

Manaoga

Tatou tatalo pea mo lena alofa tunoa e lava ma totoe, e faaauau ai lo tatou valaauina. Ia tupu pea le alofa i le va nonofo ai o tagata i faiga malo, nuu, aiga, faapea le ekalesia.

Aperila 21 – 27

Tusi Faitau: Kenese 3:1-15

Manatu Autu: Filifiliga lelei
(Choose wisely)

Faafetai

Ona o filifiliga tonu ma lelei ua manuia ai aiga, nuu ma le ekalesia. Ona o le taulaga na saunia e Keriso, ua ola ai le lalolagi agasala.

Faatoesega

Ona ua lē tonu a tatou faaiuga fai ona o le mana’o lasi ma le tu’inanau. Ona ua tele mea lelei ua aumai e le Alii, ae itiiti la tatou fo’ai atu ia te ia.

Manaoga

Ia aumaia e le Atua le tofā poto ma le manino e tatou te faatino ai le mea sa’o ma le moni.

Aperila 28 – Me 4

Tusi Faitau: 1 Peteru 4:1-11

Manatu Autu: Ia agalelei le tasi i le isi
(Be kind to one another)

Faafetai

Ona o meaalofo eseese ua foai mai e le Atua, ua mafai ona tatou fesoasoani ai i isi tagata. Ona o le agalelei mai o nisi ia i tatou, e ui e le tu’ofe le sootaga, ‘a ona o le Atua.

Faatoesega

Ona o le papa’u o lo tatou alofa aemaise o uiga pa’a’a tatou te faaali i isi uso a tagata. Ona ua le avea i tatou ma fesoasoani mo e puapuaga.

Manaoga

Tatou tatalo mo e o puapuagatia i le lalolagi, ia pa’i atu i ai aao agalelei o le Atua. Ia maua le loto fegalegalea’i o le tasi i le isi, e maua ai le galulue faatasi i le loto lelei.

Me 5 – 11

Tusi Faitau: Faataoto 31:26-31

Manatu Autu: O Tina, le fautua lelei
(Mother, the good counselor)

Faafetai

Tatou faafetai i le Atua ona o tinā ma lo latou taūa i mea uma. Ona o le fautua a tinā ma la latou tausiga ua manuia ai aiga uma, aemaise malo e oo lava i le Ekalesia. Ona o le alofa faatinā o le Atua ma lana tausiga i lana lalolagi na faia.

Faatoesega

Ona o le sauāina pea o tinā i le tino, mafaufau ma le agaga i faatinoga ma aafiaga ole gagana. Ona o le itiiti o le amanaiaina o le tuualalo a tinā i le tele o taimi, ona o lo latou ta’u o le itupa vaivai.

Manaoga

Ia faamanuia le Atua i tinā ao lumanai lo latou aso faapitoa. Ia avea pea tinā ma faatupu ola, fa’amoemoe ola, ma faatumu ola i totonu o mafutaga eseese. Ia tumau mai luga ia i tatou le alofa tasi mai o le Atua lo tatou tamā ma lo tatou tinā.

Me 12 – 18

Tusi Faitau: Mataio 28:16 – 20

Manatu Autu: O le tiute o le soo
(The duty of a disciple)

VAIASO MUAMUA O LE FONOTELE

Faafetai

Ona o lona valaauina o lo tatou faatauavaa e mona so'o i tiute eseese e auauna ai i aiga, nuu, malo aemaise o lana ekalesia. Faafetai ona o uluai misionare na molimoli mai le Talalelei ua faa-talaleleiina ai Samoa.

Faatoesega

Ona o lo tatou le faamaoni i lo tatou valaauina e avea ma soo, e le gata i lana talalelei, ae faapea foi i agavaa eseese ua tofofi i ai le soifua galulue o ona tagata.

Manaoga

Ia tautoaluaina pea i tatou e le Agaga Paia e maua ai le lototele i o tatou valaauina i soo se mea ua galulue ai. Faamanuia le molimau faa-soo a le Ekalesia. Ia alofagia e le Atua le ma'ave eseese o le usugafono ma le Fono Tele o lenei tausaga.

Me 19 – 25

Tusi Faitau: Iakopo 1:13-18

Manatu Autu: O le talita i tofotofoga
(The shield against temptation)

Faafetai

Ona e ui i tofotofoga ma faaosoosoga, a ua manumalo pea lona alofa tunoa. Ona o le galuega a le Agaga Paia, ua tupu ai le mautinoa i ituaso e fesouaina ai le ola.

Faatoesega

Ona ua tatou toilalo pea i tofotofoga a le lalolagi. Ona o tatou tu'inanauga, ua toilalo ai le ola faaleagaga.

Manaoga

Ina ia faamalosi i le tatalo, tatou te manumalo ai i le fili. Ia avea pea e le Atua lo tatou ola, ma ia avea pea o Ia ma o tatou talita i aso leaga.

Me 26 – Iuni 1

Tusi Faitau: 1 Samuelu 17:45-50

Manatu Autu: Aua le fefe i faafitauli o le lalolagi
(Do not fear the troubles of the world)

Faafetai

Aua e i ai pea le Atua i taimi e lofia ai tatou i faafitauli. Faafetai ona o le mana o le Agaga Paia, na loto tetele ai tua'a ua mavae e finauina le saolotoga mo Samoa ma ona tagata.

Faatoesega

Ona o lo tatou atuatuvaale ma le fefe i taimi o faigata. Ona o le vaivai o lo tatou ola tatalo, o le au'upega sili lea mo kerisiano e maua ai le malosi fou.

Manaoga

Ia faalototeleina i tatou e le Atua, e maua ai le mautinoa i valaauina eseese ua tofofi i ai lana fanau. Tatou tatalo ia manuia le malo o Samoa, mai lava i ona ta'ita'i e oo i ona tagata nuu uma.

Iuni 2 – 8

Tusi Faitau: Roma 6:18-22

Manatu Autu: Mai le agasala i le amiotonu
(From sin to righteousness)

Faafetai

Ona o le alofa tunoa o le Atua, ua laveaiina ai tatou nai le pologa o le agasala. Faafetai i lana Tusi Pa'ia, ua faailoa mai ai le ala e ta'u amiotonuina ai tatou.

Faatoesega

Ona ua tatou agasala pea ma ua avea ai tatou ma auauna le amiotonu. Ona o ala pi'opi'o o le lalolagi, ua aafia atu ai ma le au kerisiano.

Manaoga

Tatou tatalo pea i le Atua na te faasino mai le ala tonu tatou te ui ai mo le manuia o tatou tiute fai. Tatou tatalo mo i latou i le lalolagi ua aafia ola ona o faiga le amiotonu.

Iuni 9 – 15

Tusi Faitau: Mataio 13:24-35

Manatu Autu: Ia mataala!
(Be alert)

Faafetai

Tatou faafetai ona o le malo o le Atua ua folafolaina mai mo soo se tagata faatuatua. Ona o lana leoleoga i o tatou ola, ua tatou mautinoa ai o lo tatou Atua, e le tulemoe, e le moe lava.

Faatoesega

Ona o lo tatou le mataala i le faatinoga o lo tatou valaauina, ua tutupu ai le tele o faafitauli i lotoifale o aiga, nuu ma le ekalesia. Ua tatou le fua tele mai pei o saito lelei, ona ua fetinai'ina i tatou faatasi ma titania o le lalolagi.

Manaoga

Ina ia avea lo tatou ola faatuatua pei o le sinapi, ia tupu mafala, e mapu mai i ai nisi e toatele. Ia fua tele mai la tatou luluuga saito o faia i le olaga nei, ma manuia ai le galuega o le malo o le Atua.

Iuni 16 – 22

Tusi Faitau: Kenese 15 :1-6
Manatu Autu: O le Atua o folafolaga
(*The God of promises*)

Faafetai

Ona o le faamaoni o le Atua i ana folafolaga mo i tatou lana fanau. Ona o ana faamanuiaga sasaa mai, ua tua i ai lo tatou ola i soo se auala.

Faatoesega

Ua galo ia tatou le tele o folafolaga a le Alii i mea e manuia ai, ona ua pupū o tatou loto i folafolaga sese a le lalolagi e fono ai.

Manaoga

Ia tumau lo tatou ola talitonu i ana folafolaga ua faailoa mai, aua o ala ia faamanuiaga mo soo se tagata faatuatua. Ia fesoasoani mai pea lona Agaga Pa'ia, e tautoaluaina lo tatou ola ofoina mo ia ma lona finagalo.

Iuni 23 – 29

Tusi Faitau: Filipi 2:2-8
Manatu Autu: O le tele o sulu, e maua ai figota
(*There is greater success in teamwork*)

Faafetai

Faafetai i le galuega lilo a le Agaga o le Atua, na maua ai le mafanafana o le galulue faatasi i ona manuia ua faasafua mai. Faafetai ona o le matagofie o le ola galulue faatasi.

Faatoesega

Ua avea le manatu faapito ma ala ua le mafai ai ona tatou galulue faatasi mo le manuia lautele o tagata. Ua avea o tatou tulaga tualoa ma ala ua tatou vaai maualo ai i isi tagata.

Manaoga

Tatou tatalo mo le mana o le Agaga Pa'ia na te fusia faatasi i tatou, e mautinoa ai le manuia o faiva ma tiute ua valaauina ai.

Iuni 30 - Iulai 6

Tusi Faitau: Isaia 41: 10 – 15
Manatu Autu: O le Atua lavea'i
(*God the savior*)

Faafetai

Ona o le alofa lavea'i o le Atua na faaalua e ala ia Iesu Keriso. Ona e tiga ona tele fita ma faigata o le ala, ae le o tuulafoaiina tatou e ona aao alofa.

Faatoesega

Ona ua tatou le saili i le Atua i le tatalo, a ua tatou fofo faafitauli i lo tatou lava iloa. O le itiiti o lo tatou faatuatua, pe a oo mai ituaso louloua o le olaga.

Manaoga

Ia faamalosi'au ma fesoasoani mai pea le Agaga Pa'ia, e maua ai le malosi fou e fetai'a'i ai ma lu'itau o le ola valaauina. Ia tumau mai lona agalelei i le savaliga a le au faatuatua i le afa mulimuli o lenei tausaga.

Iulai 7 – 13

Tusi Faitau: 1 Korinito 3:10-15
Manatu Autu: Iesu le faavae mautu!
(*Jesus is our solid foundation*)

Faafetai

Ona o lana meaalofa sili e ala ia Iesu, ua avea ma faavae mautu o le Ekalesia. Ona o le faaolataga na tapena e Iesu le faavae.

Faatoesega

Tele taimi ua tatou o ese mai ai i le faavae moni o lo tatou valaauina. Ona ua avaga o tatou loto i faavae sese ua faamaite e le potu o le lalolagi.

Manaoga

Ia avea pea Iesu ma faavae e tasi o lo tatou malo o Samoa. Foa'i mai le lototele, tatou te galulue ai e faamautuina pea le faavae papa o lana Ekalesia.

Iulai 14 – 20

Tusi Faitau: Isaia 6:1-8

Manatu Autu: Talia lou valaauina
(Accept your call)

Faafetai

Ona o le faaaogaina e le Atua o lo tatou faatauva'a. Ua tatou mautinoa e le tuulafoaiina e le Atua lo tatou valaauina.

Faatoesega

Ona o lo tatou le faamaoni i o tatou valaauina. Ua tele ina tatou le lagonaina le taua o le faaaogaina o tatou i tiute ma faiva.

Manaoga

Fesoasoani mai le Agaga ia aua nei faalavelaveina lo tatou valaauina mo ana feau. Ia aaoaina foi i tatou ia iloa ona tali atu i le valaau mai o le Atua.

Iulai 21 – 27

Tusi Faitau: Salamo 46:1-7

Manatu Autu: Tapena mo puapuaga
(Prepare for tribulations)

Faafetai

Ona o meaalofa o le onosa'i ma le faatuatua e lavatia ai puapuaga. Ona o puapuaga o lo tatou Alii ua tatou ola ai.

Faatoesega

Ona o lo tatou popolevale i ituaso e oo mai ai puapuaga. Ona o lo tatou le faalagolago i le Atua, ae ua fa'amoemoe i lo tatou iloa.

Manaoga

Ia laveaiina i tatou i taimi faigata o le ola, aemaise o puapuaga ogaoga e le oo i ai se mafai o le tagata. Tatou tatalo ma le mautinoa, ua nao le Atua lo tatou maluapapa.

Iulai 28 – Aokuso 3

Tusi Faitau:

1 Korinito 10:12-14

Manatu Autu:

Ia nofo-uta i faaososoga
(Be aware of temptations)

Faafetai

Ona o lona le tuulafoa'ina o tatou i taimi o faaososoga. Ona o le faamanatu mai o le Tusi Pai'a, ua maua ai lo tatou lototele e feagai ma luitau e tofotofoina ai le ola faatuatua.

Faatoesega

Ona ua tatou toilalo i faaososoga o le ola. Ua tatou teena le Agaga Pai'a, o le ala lea o lo tatou toilalopopo i tofotofoga.

Manaoga

Ia fesoasoani mai le Agaga, ne'i malo mai le fili i lo tatou ola taumafai. Aumai lona alofa tunoa, e saogalemu ai tatou mai togafiti a le tiapolo.

Aokuso 4 – 10

Tusi Faitau:

Esoto 3:13-15

Manatu Autu:

O le 'O A'U'sili
(The great I am)

Faafetai

Ona o le Atua ua faailoa mai, o le na faatupu ola, o loo faatumauiina le ola, o Ia foi o le fa'amoemoe o le ola. Ona o Iesu na faia le faaolataga.

Faatoesega

Ona ua faavaivaia lo tatou ola auauna ina ua tatou toilalo i upu ma tala a le lalolagi. Faamagalo lo tatou vaai maualalo i isi uso a tagata.

Manaoga

Ia faaaogaina e le Atua o tatou vaivai, ma liua e fai ma malosi e faatino ai le valaauina. ia fesoasoani mai le Agaga Pai'a i ituaso e faavaivaia ai tatou e tofotofoga a le lalolagi.

Setema 8 – 14

Tusi Faitau: Filemoni 1-7
Manatu Autu: Ia pulea e le alofa
(*Let love conquer*)

Faafetai

Faafetai ona o le alofa ua mafai ai ona momoli faalaeiau mo e ua pagatia. I le alofa o Iesu ua faasaolotoina ai tatou nai le pologa.

Faatoesega

Ona o le leai o se loto faamagalo ia i tatou. Ona ua vaivai lo tatou alofa i le galuega a le Atua.

Manaoga

Ia avea i tatou ma faalaeiau mo e ua vaivai le ola faaleagaga. Ia tatou faamalolosi i le galuega alofa o le faamalosi'au.

Setema 15 – 21

Tusi Faitau: Esekielu 11:14-20
Manatu Autu: O lo tatou sulufaiga ma lo tatou 'olo
(*Our refuge and fortress*)

Faafetai

Ona o le Atua ua fai ma 'olo tatou te sulufa'i i ai i ituaso e feagai ai ma fita o le ola. Ona o le faaaogaina o tomai ma agavaa o nisi, e fai ma Mapusaga mo i latou o mama'i, aemaise o le fia maua o le filemu.

Faatoesega

Ona ua tatou le fia nonofo i le malu ma le saogalemu o aao o le Atua, ona ua mafanafana tuinanauga o le lalolagi. Ona ua taapeape

le tele o mafutaga, ina ua le maua se mapusaga i la tatou taitaiga.

Manaoga

Ia avea i tatou o ni 'olo mautu, e to'a ma mapu i ai i latou o fia maua le ola saogalemu. Ia tatou sulufa'i pea i aao agalelei o le Alii, o ia e mama ai avega mamafa o le olaga.

Setema 22 – 28

Tusi Faitau: 1 Tesalonia 5:12-28
Manatu Autu: O le faateleina le alofa i le aiga
(*Investing love in the family*)

Faafetai

Ona o le talalelei o le alofa ua osiosi ma mautu ai mafutaga i totonu o aiga. Ina ua tatou mautinoa o i tatou uma, o le aiga ua alofaina pea e le Atua.

Faatoesega

Ona ua tauau ina mate le alofa i totonu o mafutaga faale aiga, ua afua ai le tele o to'atuga i le ola o fanau aemaise le va faale-ulugalii. Ona ua papa'u lo tatou alofa i le Alii.

Manaoga

Ina ia faatuputeleina e le Atua lo tatou alolofa i a tatou fanau i totonu o aiga, e maua ai le mafanafana o sootaga. Ia faateleina o lo tatou alolofa i le aiga o le Atua i le lalolagi, o lana Ekalesia lea.

Setema 29 – Oketopa 5

Tusi Faitau: Mataio 18:21-22
Manatu Autu: O se loto faamagalo
(*A forgiving heart*)

Faafetai

Ona o lana meaalofa sili na ala ia Iesu ua faamagaloina ai a tatou agasala. O le galue mai o le Agaga, ua mafai ai ona tatou maua le loto faamagalo atu.

Faatoesega

Ua faamagaloina i tatou e Iesu, a ua faigata ona tatou faamagaloina atu. Ona ua faigata ona tatou faatupu le leleiga i e ua ita mai.

Manaoga

Ia aveva tatou ma faaa'oa'o o le ola faamagalalo atu. Ia tatou maua le loto maualalo tatou te alolofa atu ai ma le faamai o tatou fili.

Oketopa 6 – 12

Tusi Faitau: Salamo 127:3-5

Manatu Autu: **O fanau o faamanuiaga mai le Atua**
(Children are blessings from God)

Faafetai

Ona o le meaalofoa a le Atua e ala i fanau. Ona o lo tatoau tofi lea, latou te faaaauaina gafa o aiga, nuu ma ekalesia.

Faatoesega

Ona o le sauaina pea o fanau i aiga, nuu ma le atunuu. Ona o lo tatou faatalale i le meaalofoa a le Atua. Ona ua le tonu ona a'oa'o fanau i ala o le Atua.

Manaoga

Tatou tatalo ina ia faasino ala pea le Atua i le ola o a tatou fanau. Ina ia a'oa'o mai le Atua i ala e faasino ai fanau i lona finagalalo. Ia fanau mo ana feau.

Oketopa 13 – 19

Tusi Faitau: Luka 6:34-36

Manatu Autu: **Ia agalelei i e agatele mai**
(Be kind to the ungrateful)

Faafetai

I le alofa o le Atua ua ia le manatua ai o tatou sese. Ona ua a'oa'o ina i tatou ia iloa ona alolofa atu i e agaleaga mai. Ona o le agalelei mai o nisi i lo tatou foi vaivai.

Faatoesega

Ona ua le mafai ona tatou faatino le alofa e tatau ai. Ona ua leai se lot faamagalalo ia i tatou. Ona o lo tatou ola tau ma sui.

Manaoga

Ina ia atagia i lo tatou ola le alofa faale-Atua. Ia a'oa'o ina i tatou ina ia iloa ona alolofa atu i e agaleaga mai.

Oketopa 20 – 26

Tusi Faitau: Iakopo 4:9-10

Manatu Autu: **Ta'u faatauvaaina i luma o le Atua**
(Be humble before God)

Faafetai

Ona o lona amanaia o lo tatou ola agasala. Faafetai i le avanoa o le tagata agasala i lona alofa tunoa.

Faatoesega

Ona o lo tatou ola faamaualuga ua mamao ai i tatou ma ia. Ona ua tatou le iloa ona toe foi ia te ia i le loto salamo.

Manaoga

Ina ia faamaloloina e le atua lo tatou faamaualuga ma le faasausili. A'oa'o ina i tatou ina ia tatou iloa ona auauna ia te ia i le loto maualalo. Ia lagona pea lo tatou ola faatauva i luma o le Atua.

Oketopa 27 – Novema 2

Tusi Faitau: Kenese 5:21-24

Manatu Autu: **O le ola e mālīe i le Atua**
(The life that pleases God)

Faafetai

Faafetai i le Atua on o le taiala ua ia tuuina mai tatou te ola ai. Ona o le alofa le faatuaioia o le Atua ia i tatou. Ona o Iesu ma le alofa na faasafua mai.

Faatoesega

Ona o lo tatou o ese mai le alafua na faataatia e le Atua mo tatou. Ona ua tatou filifili e savavali i o tatou lava ala. Ona ua le mālīe i le Atua lo tatou ola.

Manaoga

Ina ia a'oa'o ina i tatou i ala e mālīe i ona fofoga. Tatou iloa le finagalalo o le Atua i ala tatou te savavali ai. Ia mālīe i le Atua lo tatou ola ofoina mo ia.

Novema 3 – 9

Tusi Faitau: **Mareko 12:41-44**
Manatu Autu: **Ave taulaga i le Atua**
(Give offerings to God)

Faafetai

Ona o lona faatupuina o lo tatou agaga faitaulaga ia te ia. Ona o le taulaga sili e ala ia Iesu Keriso o lona alo e toatasi.

Faatoesega

Ona ua tatou le ofoina ma le loto malie taulaga mo ia. Ona ua tatou faasili nisi mea mo lo tatou lava manuia. Ona o le moni atoatoa o lo tatou alolofa ia Iesu lo tatou Alii.

Manaoga

Ia foa'i mai le olioli ma le fiafia e fai tualaga ai ia te ia. ia viia le Atua i mea ua tatou ofoina e fai ma taulaga. Ia faamanuia mai le Agaga i le soifua faitaulaga o lana fanau.

Novema 10 - 16

Tusi Faitau: **Esoto 2:1-10**
Manatu Autu: **Fuafuaga pa'ia a le Atua**
(God's plan)

Faafetai

Ona o totonu o puapuaga ma mea faigata, tatou te iloa ai le faaaliga o lona silisiliese. Ona o le faaaogaina o tatou tagata e faatinoina mea ua ia finagalo ai. Ona o lona finagalo alofa mo tatou laveaiina.

Faatoesega

Ina ua tatou le faia o le finagalo o le Atua. Ona o lo tatou teena pea o lona valaau mai.

Manaoga

Ina ia tatou iloa atili o ia ma lona faatasi mai itotonu o tatou ituaso o puapuaga ma faigata. Ina ia aumai le olioli ma le fiafia onosa'i ai tiga o le ola. Ia faaaogaina pea o tatou tagata i mea ua ia finagalo i ai.

Novema 17 – 23

Tusi Faitau: **Ioane 15:1-11**
Manatu Autu: **Iesu le vine moni**
(Jesus the true vine)

Faafetai

Ona o le moni ma le faamaoni o lona alofa ua avea ai tatou ma lala o le vine moni. Ona o tatou sootaga faa lala i le vine moni ua tatou malolosi ma saogalemu ai. Ona o Iesu ua fai ma pogai mausali mo lo tatou ola faatuatua.

Faatoesega

Ua avea i tatou ma lala mago o le vine moni ona o a tatou agasala. Ona o faafatiatama'i o lenei olaga ua tele ina tatou toilalo ai.

Manaoga

Ina ia foai mai e le Agaga Paia le malosi ma le mana e anagata ai lo tatou avea ma lala o le vine moni. Ina ia Ii tatou pea lona alofa tunoa e lausiusi ai o tatou lala i le faatinoga o soo se valaauina.

Novema 24 – 30

Tusi Faitau: **Kolose 3:12-15**
Manatu Autu: **O la'ei o le Kerisiano**
(Christian wear)

Faafetai

Ona o la'ei faaleagaga ua fai ma faamalosi'au i lo tatou faatuatua ua onomea ai lo tatou faatauvaa. Ona ua faaofuina i tatou i le Agaga Paia, ua lavea'ina ai tatou mai mailei a le fili.

Faatoesega

Ona ua masaesae ofu o loo tatou oofu ai ona o le malosi o le agasala. Ua tatou le fiafia e oofu i la'ei o le Agaga ona ua tatou teena pea a'oa'oga o le ola faapaiaina.

Manaoga

Ia faasinasinaina pea o tatou ofu i le toto o le tama'u mamoe. Ia maua le fiafia e ofu i la'ei o le malo e faavavau.

Tesema 01- 07

Tusi Faitau: Teuteronome 28:1-14
Manatu Autu: O faamanuiaga o le savavali ma le Atua
(The blessings of walking with God)

Faafetai

Ona o ia ua faatonufoiau i o tatou ala uma. Ona o ia tatou te malolosi ma manuia ai. O lona malamalama o loo faatino ai o tatou valaauina.

Faatoesega

Aua ua tatou mele o na manuia ona ua tatou o ese mai i ona ala. Ona o lo tatou le talitonuina o lona faamalosi mai. Ona o lo tatou teena pea o lona malamalama.

Manaoga

Ia faatumauina pea lana ta'ita'iga i lo tatou ola. Ia foai mai lona potu e agatonu ai lo tatou vaivai. Ia foai mai le loto mataala tatou te gafatia ai ona feagai ma tiga ma puapuaga o le ola nei.

Tesema 08 – 14

Tusi Faitau: Kolose 3:1-4
Manatu Autu: Ola fou ia Keriso
(New life in Christ)

Faafetai

Ona ua faailoa mai e Iesu ala o le ola fou tatou te savavalai ai ma le mautinoa. Ua ia faaali mai taunuuga matagofie ma manuia faavavau o le faaolataga mo i tatou.

Faatoesega

Ona o lo tatou le gaua'i e suia o tatou ola mai le tuai i le ola fou ua faasino mai e Keriso. Ona ua tatou le ta'ita'i o tatou aiga ma fanau i le ola fou. O lo tatou tosina pea i ala leaga o lenei lalolagi.

Manaoga

Ina ia faatumuina o tatou loto i ala o Keriso e manuia ai. Ia ta'ita'iina le ekalesia i le ola fou ua faatonu mai e Kesu Keriso.

Tesema 15 – 21

Tusi Faitau: Numera 8:1-20
Manatu Autu: Usita'i ma faamaoni i le Atua
(Obey and be faithful to God)

Faafetai

Ona o le Tusi Paia, o ana Afioga mamana ma le aoga mo i tatou uma. Ona o le Talalelei ma le laugaina pea o lana upu e faamalalamalama ma faamafanafana lo tatou ola.

Faatoesega

Ona ua na o lo tatou faalogo ae ua le usiusitai faamaoni ma faia lona finagalo. Ona ua tatou faafofiga o ni tagata usitai ia tatou upu ma tala, ae ua le tusa ma amioga. Ona ua gaua'i o tatou loto i tuinanau o le tino ma ua le amanaia ai le finagalo o le Atua.

Manaoga

Ia fesoasoani mai le Agaga o le Atua ina ia manino la tatou faalogo ma faamausali lo tatou loto usiusitai i lona finagalo. Ia tatou iloa o lona finagalo e sili lea mo i tatou. Laveai mai i tatou i lo tatou ola le usiusitai ma le le fia faalogo.

Tesema 22 – 28

Tusi Faitau: Mataio 2:1-6
Manatu Autu: Ua ia i tatou le Tupu!
(The King is with us)

Faafetai

Ona o Iesu 'O LE TUPU' ua foai'ina mai e le Atua le Tamā ua olioli ai le lalolagi uma. Ona o lo tatou tupu, ua sili ia te ia le alofa ma le auauna i tagata.

Faatoesega

Ona ua tatou teena pea lo tatou tupu. Ua le faamaoni la tatou auaunaga e ui ua tele lona alofa mai.

Manaoga

Ia saunia faaleagaga o tatou loto e talia ai lona afio mai. ia tatou maua pea ana faamanuiaga i le tino ma le agaga. Ia tumau pea lana pule ia i tatou i le lalolagi seia oo i le faavavau.

Tesema 29, 2024 – Ianuari 04, 2025

Tusi Faitau: Tito 2:11-14

Manatu Autu: Alofa tunoa o le Atua
(God's grace)

Faafetai

Ona o lona alofa tunoa, ua ia valaauina ma faaaogaina ai i tatou i galuega o le 2024, auā o lona mana na mafai ai ona faataunuaina mea lelei uma. Ona o le onosai ua mafai ai ona tatou galulue ma le le faalogologotiga.

Faatoesega

Ona ua tatou fa'amoemoe i lo tatou malosi i lenei tausaga atoa a mavae atu, a ua tatou le faatalitali i le musumusuga a le Agaga Paia. Ona ua tatou le onosai ma saili lona finagalo i le tatalo.

Manaoga

Ia foai mai le malosi ma le filiga e faaauau ai i o tatou valaauina mo le 2025. Ia maua le onosai e faatalitali ai i lana faasinoga ma aua tatou vaivai ai. Ia mausali pea lo tatou fa'amoemoe ma le faatuatua i lona mana i mea uma.

